



Akoz nou demann NOUVO ELEKSYON

NAPA DIREKSYON

I annan bokou keksoz ki bezwen aranze, me napa direksyon.

Ozordi Sesel i dan en sityasyon ki pe met nou retar. Avek Lasanble e Lekzekitiv ki dan lanmen de lafors diferan i difisil avanse.

LDS in eksplik lepep Seselwa ki sel pouvwar ki i annan se dan Lasanble Nasyonal, kot i kapab demann kestyon e met bann problem ki ekziste o-kler. An traver bann mosyon i sey propoz solisyon me i nesese ki Lekzekitiv ki pran aksyon. Sa pa pe arive.

I nesese ki nou deblok sa sityasyon e sel manyer pou fer li se par nouvo eleksyon prezidansyel.

DANNY OUT!

An traver mosyon dan Lasanble, nou'n apel Msye Danny Faure pour demisyonnen e ouver semen pour nouvo eleksyon. Sa i en demann

serye me nou pa pe fer sa zis pou tir Msye Faure. I sel manyer pour donn Sesel en gouvrenman kot tou le de brans, Lasanble e Lekzekitiv, pe swiv menm vizyon.

Nou kwar ki Sesel ozordi i bezwen tou le de lafors pour rezourd bann problem e fer sanzman nesese pou permet nou pei avanse.

Tandi ki LDS in met bann sityasyon irzan devan Msye Faure, i pa'n pran okenn aksyon e keksoz pe trennen.

ARET KORIPSYON

Enn bann size pli enportan ki LDS in met bokou zefor lo la se met lord dan finans gouvrenman. Sa i en responsabilite prensipal aköz i konsern larzan lepep Seselwa. Tou larzan ki perdi i larzan ki devre al pou amelyor kondisyon lavi pour lepep Seselwa. I annan bann sonm konsiderab ki LDS in fer sorti.

*\$50 milyon dolar ki ti ganny donnen par gouvrenman Abu Dhabi ki swadizan ti pou al pour aste marsandiz pour SMB me ki napa leksplikasyon ki manyer in ganny depanse.

*Plizyer sonm enportan ki'n ganny peye malapropo dan kont FIU ek NDEA

*Larzan dan bidze State House ek Defans ki pa'n ganny servi dapre regilasyon.....E lezot ankor.

*R800,00 tou le mwan ki Parti Lepep pe pran tou le mwa avek SMB, ki pe ede fer marsandiz pli ser.

Lasanble pa kapab pran aksyon pour aret bann tel ka e pour fer demars pour fer sa bann larzan retourn pour pep Seselwa kot i posib. Pour sa LDS i bezwen pouvwar ekzekitiv pou met lord dan finans gouvrenmen

Kontinye lo paz 2



Akoz nou demann NOUVO ELEKSYON

RETOURN PROPRIYETE LETA

Later i en size vivan e emosyonel pour tou dimoun. I annan en kantite dimoun ki bezwen later pour fer lakaz pour zot fanmir obyen pour enn pti biznez enkli lagrikiltir. Parmi sa bann dimoun i annan ki'n esper later pour plizyer lannen. An plis ki sa, gouvènmman li-menm i touzour mank later pour fer bann devlopman nesese, enkli lozman.

Travay Lasanble in montre ki i annan en konplo pour pran later leta pour benefis personel.

I annan ka lafanmir ansyen prezidan Rene ki'n ganny plizyer morso later endistriyel ki in nobou fer biznez avek, osi ka serten minis ki'n ganny plizyer morso. Apre sa in annan Parti Lepep li-menm ki'n akimil plis ki 60 morso dan tou rezyon Seselwa, bokou ki'n fer batiman lo la e lezot ki zot pe vann pour bann gro pri. Plizyer sa bann tranzaksyon in sinyen par Msye Faure li-menm.

Sa i en rezon aköz i irzan pour annan en sanzman gouvènmman. Msye Faure pa pou pran aksyon.

ARET DONN NASYON- ALITE SESELWA

Menm ki Msye Faure in fer kwar i diferan avek lezot prezidan avan, ozordi i pe montre ki i menm zafer. Lekzanp se ki in rebran pratik donn

nasyonalite Seselwa apre ki i ti'n dir i pa pou fer. La ankor, Lasanble Nasyonal in montre ki i annan pre 60 ka nasyonalite ki in donner. In fer sa dan fason ki pa respekte konstitisyon me plito abiz son privez koman sef deta. Nou pa konnen si Msye Faure pe fer sa pour larzan obyen pour met dimoun lo lalis voter pou vot pour li. Me fodre arete.

Avek sa nou azout dezord ki annan dan donn permi travay pour etranze, kot napa kontrol e regleman pe ganny abize.

ANPES BAZ MILITER ETRANZE DAN NOU ZIL

Nou'n war osi ki Msye Faure i anvii persiste avek plan pour en fasilite militer lo nou zil ki kapab ganny servi par pouwar militer etranze. Menm ki i ti'n dir i kont sa plan pour Lend annan kontrol lo en baz militer, in aksepté en kredi \$100 milyon dolar pour devlopman fasilite. LDS in dir i kont okenn plan parey me i oule fer sir ki sa pa ganny fer par deryer ledò lepep Seselwa. I nesese ki nou get vre nesese fasilite defans e sikirite lo nou bann zil e ki okenn fasilite i pour Seselwa. Nou napa konfyans ki Msye Faure pour respekte sa.

DEFAYANS SEKIRITE NASYONAL

Nou trakase pour nou sekirite.

Nou pa kwar ki lekzekitiv i annan en bon plan pour protez pei kont latakt sorti a letranze. Sa i en size ki kareman anba responsabilite Msye Faure koman Prezidan e lensidan kot en bato etranze ti antre dan por san ki lotorite i konnen in montre sa gran defayans. Nou sekirite entern osi i trakasan avek bann menas parey trafik drog e bann dimoun ki pe sey senm lafreyer. Nou war tro bokou ka kot dimoun i disparet e pa war ankor. Byen sir, sa i travay lapolis me dirizan an sef i devre montre son konsern e pran aksyon pour konbat kont bann tel menas lo nou lasosyete.

MSYE FAURE I DAN SISTENM LEPASE

Menm ki in sey prezant en nouvo stil, Msye Faure i dan sistenm lepase. In la depi lontan dan bann pozisyon pouwar e in ede anmenn sa bann sityasyon ki nou war ozordi. Nou bezwen get li koman par dan problenm e pa solisyon. Tou bann keksoz ki nou pe koz lo la ozordi, koripsyon, vol later, trafik drog, in devlope ler i ti la. Si in ede anmenn, i pa pou konbat zot ozordi.

SE AKOZ SA NOU BEZWEN SANZMAN !

SE AKOZ SA NOU BEZWEN NOUVO ELEKSYON!

Lamars pour nouvo eleksyon

Sanmdi 3 Novanm

Rasanble lo Stad Popiler 9.30

VIN DONN OU SIPOR POU KONPLET SANZMAN

Linyon I Fer Lafors